

# Täterää!

Ess gibt im Aacheblick nor oo Thema unn dess iss Fußball. Gut, aach desdeweeche, weil die deutsch Monnschaft so gut spille unn aach gewinne dut. Uffgereecht werdd sich awwer noch immer iwwer die Bloserei, die merr im Fernseh heert wie enn Schwarm Hummele uffem Sonndaachsausflug unn die merr nor eweck kriecht, wenn merr de Ton abschalte dut. Awwer wer will dess schunn, weil aach bei sooner Fußballiwwertragung omm End de Ton die Musik mächt.

Unn weil dess so iss, hawwe mir omm Stommdisch nodierlich aach von nix onnerm gebabbelt als vom Schweinsteiger, vom Müller unn vom Klose, unn dass de deutsch Monnschaft unn ihm Spill nix bessers bassiern konnt als dass de Ballack verletzt worrn iss. Unn nodierlich von de Begeisterung, die de iwwerall uffem Lond unn in de Städte erlewe konnst, wenn sich vill Leit treffe, um beim Erlebnis-Fernsehen – frieher hott merr Papplück Vjuing gesaat – zesomme ze kreische unn sich um de Hals ze falle.

Bei sooner Veroostaltung werdd awwer nit so vill geblose wie in dene Stadione in Südafrika, hott de Karl gemoont, doo unne muss dess joo gonz schlimm soi.

Doo sächt de Schorsch: De Neescher hott schunn immer gern „Täterää“ gemacht.

Ich habb emm Schorsch die Hond uff die Schulter geleecht unn gesaat: Schorsch, dess Wort Neescher soll merr nimmi in de Mund nemme. Mir hawwe dess joo noch in de Schul gelernt, awwer heit sächt merrs nimmi.

De Karl hott genickt, hott awwer trotzdem gefroocht: Warum eichentlich? Waaßt du warum, Honnes?

Ich saach: Ich habb grad in dere Woch driwwer gelese. Weil dess Wort iwwer e long Zeit nor so verwend worrn iss, als ob enn Neescher nitt nor schwarz, naa, aach dumm unn ferr nix onnerst ze gebrauche wär als de weiße Herrn die Schuh ze butze. Unn desweeche dut merr dess Wort nimmi gebrauche, ess dut die Schwarzafrikaner abwerte unn beleidische.

Moont de Karl: Unn dess wolle merr joo nit.

Doo sächt de Schorsch: Gut, jetz wisse merrs. Awwer dess habb ich doch garnitt gemoont, als ich gesaat habb: De Neescher hott schunn immer gern „Täterää“ gemacht.

Ich saach: Mir haddes von de Bloserei beim Fußball unn doo host du dess gesaat. Unn dess iss nit richdisch.

Aach de Karl hott sich e bissi uffgereecht: Jetz isses gut, Schorsch, losse merrs.

Jetz iss de Schorsch laut worrn. Ja derrf merr enn Mensch nit mehr bei soim Nome nenne?

De Karl unn ich warn e bissi dorchennonner unn de Karl hott gesaat: Ei nodierlich derrf merr enn Mensch bei soim Nome nenne.

Doo moont de Schorsch: Ich habb eich nitt verstonne unn ihr habt mich nit verstonne, weil ich was gonz onnerst gemoont habb.

Was hosden gemoont?, habb ich gefroocht

De Schorsch war e bissi traurich. Wie ich gesaat habb de Neescher hott schunn immer gern „Täterää“ gemacht. doo habb ich de Ernst Neescher mett soim „Täterää“ gemoont, mett soim „Humba, humba täterää!“

Eiern Honnes